

# SAN PABLO CARTA COLOSAS CHJAMBTEWE'SH JÏI

Dyus yacj fi'nzesa Colosas chjambtewe'shtyi Pablo fi'jni

**1** <sup>1</sup> Andya' Jesucristo jycaajnis Pablo yaasetj, tyã'wête selpiwa'jsa Dyus nviitnisa. <sup>2</sup> Tyãa pa'ga Dyus luuch Colosas chjambtewe'sh jÏi naa carta's fi'jrra cajaststju, Cristo's nwêese'jsawe'shtyi wechana yacjtjê'j Timoteo yacj. I'cue'shtyi' Dyus cue'sh Tata' pu'chjina, ewrráa caafi'nze'jna.

Dyus yacj fi'nzesawe'sh pa'gate Pablo Dyus yacj puuty we'wenni

<sup>3</sup> I'cue'sh pa'gate Dyus yacj puuty we'wetsrra', cue'shtyi nwe'wesa Jesucristo Tata's wala wecha'tja'w bagachteva. <sup>4</sup> I'cue'sha' Cristo Jesus yacj jypumbamée Dyus luuch jyucaysa yacj puuty ya'peeygãjna ũsta' jÏni'stja'w jiyu. <sup>5</sup> Tyã'wê i'cue'sh jÏi cielute jyaawni ũsa' tyã'sna jypa'gaya' sÏjrrane'cue tyã'wê ew fi'nze', sa' Dyus yuwe ewte nviitwa'jsa isasa's pta'shte wêse'jrrane'cue cielutewe'sha'srráa ũytjasya' yajcy. <sup>6</sup> Dyus yuwe ewte nviit-sa's pta'shnisa áchja' tyacue walaana u'juetsa' naa quiwete mtee mteeva jyuca. I'cue'shva Dyus peeygãani isasa's pta'shte', isasa yujna sÏjna jypa'ganijÏjy, ma'wêga pejnana u'j tyã'wêy yuutsa'. <sup>7</sup> Cue'sh yacjtjê'j Epafra's Cristo's selpisáa tyã'wêc Dyus yuwe ewte nviit-sa's i'cue'shtyi caapiya'j tyã'sna iipe'ji'cue. Tyã' nyafii yu' cue'sh yacjcu mjÏi pu'chsa yu'. <sup>8</sup> Tyãac Dyus Espiritu yuurrá's nwêese'jna peeygãjna ũsta' jÏna pta'sh.

<sup>9</sup> I'cue'sh tyã'wê ew fi'nzeni's pta'shiyna, Dyus yacj puuty we'wenna nestja'w yu' i'cue'sh pa'gate, tyã'wê Dyus yacj fi'nzewa'ja's quÏjte yujva jypumbamée wala ew jiyurra tyãajÏ ma'wê yujva tyutemée fi'nzeczajn. <sup>10</sup> Tyãa pa'ga i'cue'sha' Cristo jÏiyã'jrra', tyajy jycaajni yuurrá's jyuca cytey yuuna ewrráa fi'nzerra Dyus yacj fi'nzewa'ja's jwee'fírráa ew piyaane'cue. <sup>11</sup> Sa' tyajÏ' quÏjte yujva jypumbana ñusmée wechana chjáchja fi'nzene'cue. <sup>12</sup> Tyã'wê yÏurra Dyusa's ũusuj jyuca wechawa'ja's

ji'pjune'cue. Tyā' cue'shtyi jypa'gawa'lj pjeu'jrra ji'pja' tyā'sa' ūsuna tyā'sna nweēse'jsa yuutyi' jyucaysaty. <sup>13</sup>Tyāac chji'ndyte fi'nzena ūsteva, tyajū cutyi'jrra tyajy Nchi'c wendynisa tashte nvijt, <sup>14</sup>tyajy Nchi'c peltunāyrra nwe'wenisatja'w naa pa'ga.

### **Cue'sh pa'gate Cristo uupa'ga Dyus yacj yuuwemée neeyūuni**

<sup>15</sup>Dyusa' cue'sh yafyte vyaasame!, nava vyaaya' quījc tyajy Nchi'c Jesucristo cacuete. Tyāasa Cristo' Dyus írrá!, naa quiwete quījquījteva tjaacue yatstewe'sh. <sup>16</sup>Dyusa' tyajy Nchi'c Jesucristo'scu neewe'werra nvijt naa quiwe, cielu, quījquījrraj ūstyna, cue'sh yafyte vyaasáa vite! cue'sh yafyte vyaasamée tyāaty jyuca tyāarrarráa vitcajn. Tyāa pa'ga quījquījva jyuca Cristo jūita' tyajy vitnisa, sa' tyā'srrarráa nweēse'jwa'jsata!, echtjē'j ma'ty yuu angeleswe'sh ma'ty yuu nava jyuca. <sup>17</sup>Naa quiwe meetey Cristo' ūsyā'cj yu!, sa' āchva tyāa írráa ūsa!, tyajy pa'ga yuurráa quījquījva jyuca ewrráa ūsta!. <sup>18</sup>Sa' Cristo's jypa'garra tyāa yacj fi'nzesa maanzcuēesatyva jyuca Cristo írráa jycaajsa!. Tyāac nyafytewe'sh yu!, sa' tyāa írráac uurrava nyafyte qui' ityi yuu, tyāarrarráa bagachteva jycaajwa'jsa. <sup>19</sup>Dyusa' Cristo's caacj, nava le'chcuerráa yujva vitemée, Dyus írráac yu!. <sup>20</sup>Sa' Dyusa' maa yujtyva nvijtmée, naa quiwetewe'sh quījquījva jyuca Cristo's ajtsemée yuwe ewuuna pa'jwa'ja'scu vit, Cristo's cluuste uuwa'lj vitrra.

<sup>21</sup>I'cue'shva nyafia' Dyus luuchmée i'cue yu!, Dyusa's atsewa'jrrá's yajcyna fi'nzesa, ewmeerráa yūuna. Nava ewmeesarrava āchja' Dyus tashte pa'jya' ājawa'ja's Dyusíi pjeu'cj, <sup>22</sup>tyā'wē Cristo's pytjaa yuurra uuwa'lj vitrra. Naasáa cue'sh quīj pcal yujva ji'pjimée tyajy tashte yuurráa selpiina fi'nzeczajncu tyā'wē yūu. <sup>23</sup>Atsa' tyā'wē ew fi'nzeya' ājaya!, Cristo yuurrá's iiméj ew ūusuj jyuca yajcyna tyajy yuwe ewsa nwe'wewa'jsa pta'shni's jii i'cue tyajū tyutenuwe. Tyāa Dyus yuwe ewsa nwe'wewa'jsa's tyā'wē mtee mteeva jyuca pta'shni yuutsa!, atsa' tyā'sna pta'shcajncu Dyusa' nvijt andya's.

### **Dyus luuchtyi selpiicajn Dyusa' Pablo's neewe'werra nviitnisa**

<sup>24</sup>Tyāa pa'ga Dyus yuwe's i'cue'shtyi pta'shpa'ga pytjaa yuuna ūsrrava, wala wechat'j. Nava andy pytjaa yuuwa'lj yuutyi's wa'lu'lsmeetj. Cristova ma'wēga tyajy nasaa pa'gate pytjaa yuurra uu tyāa pa'ga andyva pytjaa yuuwa'lsatj. <sup>25</sup>Dyus luuchtyi selpiwa'jsac Dyusa' andya's neewe'werra nvijt, Dyus yuwe's i'cue'shtyiva pta'shcajncu quījte yujva peejymée jyuca. <sup>26</sup>Tyāniitey bagachte yujva caajiyu'jnimeesa ūsu'ne' tyā'snac Dyusa' āchja' caajiyu'lj tyajy nasaty, atsa' tyā'sna pta'shwa'jsatj. <sup>27</sup>Dyusa' tyajy yuwe caajiyu'jnimeesa iiméj wala selpiwa'jsa yu'c judiu jil'mée vite nasatyva tyā'snac caajiyu'lj tyajy nasaty. Tyā' naac yu!: Cristo' i'cue'sh ūuste u'cac, tyāa pa'ga i'cue'sha' Dyus tashte pa'jwa'ja's ji'pji'cue jina pta'shni's i'cue

jiimée yu'. <sup>28</sup>Atsa' Cristo i'cue'sh ũuste cjëeni'stja'w cue'sha' pta'shi', yu'cypejna, caapiya'ljna, jyucaysa wala ew jiyurra teehsa na'wërraj Cristo yacj yuurraá jypumbamée fi'nzewa'ja's ew piyacajn. <sup>29</sup>Tyã'wë yūuwa'ja's caapiya'ljnatj tyacue wala chjächja mjī', Cristo quijteva jyuca pu'chte.

**2** <sup>1</sup>I'cue'sha' mjiyuwe: Andya' i'cue'sh pa'gate vite' Laodiceatewe'sh vite' andyna jiimeesa ũstyna tyāawe'sh jyucaysa pa'gate iiméj wala pa'pchuna Dyus yacj puuty we'wena ũstju. <sup>2</sup>I'cue'sh jyucaysa Cristo ma'wēsateva quijte yujva peejymée jyuca ew jiyucajn tyā'wë pa'pchuna ũstju. Tyāa Cristoc i'cue'sh ũuste cjëewa'jsa yu' tyā'snac tyāniitey quim yujtyva caajiyu'jnimée ũsu'. Atsa' tyā'sna ew jiyurra' jypumbamée i'cue'sh pwe'sh puuty ya'peeygājna fi'nzene'cue. <sup>3</sup>Tyāa pa'gatey ma'wërraj jiyuwa'j peejyteva, Cristo yuurraác ũsu'. <sup>4</sup>I'cue'shtyi' tyā'wëtj ew äate pta'shi', vitesa iishiina zhichcue we'wena caypumba'jwe'shte. <sup>5</sup>Andya' i'cue'sh yacj ij ũsmeetj, nava i'cue'sh yacj ij ũs na'wë yajcyna ũstju ũuste yu', tyāasatj wala wechá', Cristo yacj yuurraá jypumbamée fi'nzepa'ga.

<sup>6</sup>Tyāasa Jesucristo's ma'wëcúe nyafíi wechana jypa'ga tyā'wëesa mfi'nzewe tyāa yacj tyutemée. <sup>7</sup>Bagachteva Cristorrá's yajcyna tyāa yuurrá's nwëese'ljna Dyusa's wechana fi'nzewa'ja's i'cue caapiya'ljni yuu, tyajū tyutenuwe.

### **Cristo ityī yuupa'ga cue'shva pcaluj ityī yuuni**

<sup>8</sup>Tyāasa i'cue'sha' wala mpa'yajcywe, naa quiwete nasaa pwe'sh yajcyrra caapiya'ljnirrá's pta'shna caypumba'jwe'shte. Tyāawe'sha' Cristo caapiya'ljni's caapiya'lsamée, ewmeesa jycaajjnirrá's cytey yuusata'. <sup>9</sup>I'cue'sha' tyā'wë caapiya'ljni's nwëese'ljwa'jsa meei'cue, tyāa pa'gatey Cristo' Dyus ma'wēsateva tyāava tyā'wëysafírrá'. <sup>10</sup>Atsa' i'cue'sha' tyā'sna ũuste jypa'ganijū' Cristo yacj teechrráa i'cue yuuna pa'ja'. Tyāa pa'ga jwee yu' vite yu' quijva peejymée yā'ji'cue, tyāa pa'gatey Cristorrarráa jyuca jycaajsa' naa quiwetewe'sh vite' ēe wasalu ewmeesa ũstyna tyāa yā'ljra. <sup>11</sup>Cristo's ũuste jypa'ganijūyā'ja', circuncidāyni na'wë yā'ji'cue neeyū'. Nava peecy cacuetewe'shna circuncidāi'ty tyāamée, i'cue'sh ewmée yūuna fi'nzenijū Cristo nwe'wenisa circuncidāyni yaase'. Cristo' tyā'wërráac yu'. <sup>12</sup>Tyā'wë yūunijū' i'cue'sha' yu'te ya'bautisāyrra' Cristo yacj ja'nda pendani na'wësa i'cue yuu, sa' Cristo yacj ja'nda qui' ityi yuusáa na'wë i'cue yuu, tyā'wë Cristo uuteva Dyusa' qui' ityi vitcu sūjwa'ja's ji'pjuil'cue naa pa'ga. <sup>13</sup>Nava nyafíi yu' i'cue'sha' pcalpa'ga Dyus dyi'pte uuníi na'wëi'cue ũsu', pcaluj tyundenimée. Tyā'wëteva āchja' Dyusa' pcaltyi jyuca peltunāypa'ga i'cue'sha' Cristo na'wëy ityi yuusáa na'wë i'cue yuu. <sup>14</sup>Cue'sha' Dyus jycaajni's nwëese'lja'gamée yuuwesane'tca'w yu'. Nava Cristo cluuste uupa'ga Dyusa' jyuca peltunāycu. <sup>15</sup>Sa' tyā'wërráa yuumée, echtjē'lj tyāa yacj ũssa yā'ljra jyuca cnayrra Cristorrarrá's bagachteva nwëese'ljwa'ja's vitrrac nvijj Dyusa'.

**Naa quiwetewe'sha's nwēese'jmée cielutewe'sha'srráa mpaacuewe**

<sup>16</sup> Tyā'wē Cristo nwe'wenisa yā'ja' āchja' quim yujva leya's nwēese'jwa'ja's jycaajwa'j ji'pjmeeta', i'cue'sh ū'ni's we'wena meerra' qui'swa'j en tyā'wēsaty. <sup>17</sup> Tyā'wē yūunisa' naasáa teech pa'jwa'jsa ūsu'c tyā'sna jypa'gawa'ja's caapiya'jsarráaty yu'. Atsa' ew jiyute yu', tyāa pa'jwa'jsa' Cristoc yu'. <sup>18</sup> I'cue'sha' īshiisawe'shtyi mpa'yajcywe. Tyā'wēme', tyāawe'sha' wala ewsatja'w jīna angeleswe'shtyi neewe'wena, quījva uysameerrava tyā'wē ewsarrá's ī'cjsatja'w jīna iwejch we'wena i'cue'shtyi caypumba'jatyna. <sup>19</sup> Tyāawe'sha' Cristo yacj fi'nzesameeta'. Cristo yacj fi'nzevats yu', wala yuj ewna, tyāa pa'gateway Cristo quijteva jyuca cchjāachja'jna tyajy nasa yuutyi' jype'jsa', Dyus jycaajni's cytey yuuna.

<sup>20</sup> I'cue'sha' naa quiwete pitstjē'jwe'sh we'weni's nwēese'jya'mée, Cristo yacj ja'nda uusáa na'wē yuusáa i'cue. Sa' ¿quījya'rráa pitstjē'jwe'sh we'weni's nwēese'jwa'jsamée yā'jrra', tyāawe'sh tyā'jīna jycaajnityi' nwēese'jna ūsuqui'cue? <sup>21</sup> Tyāawe'sha' na'wēty jycaaja': Tyā'sa' jya'ndynu, tyā'sa' ū'nu, tyā'sa' jypa'ganu jīna quījquījva wala jycaaja'ty. <sup>22</sup> Tyā'wē jycaajnis'a' naa quiwete pitstjē'jwe'sh caapiya'jnīsarráata', jyuca scjēwwa'jsa. <sup>23</sup> Tyāaty jypa'yacymeete', ewsa na'wē yuj tjenguna, tyāa pa'gateway iwejch yajcymée peecy cacue's ew caafi'nze'jwa'ja'scu jycaaja'. Nava naa quiwete ewmée yajcyna fi'nzeni's yu' neeweya' āja'tsme'.

**3** <sup>1</sup> I'cue'sha' Cristo yacj ja'nda ītyi yuusáa na'wē yuusáa yā'jrra', cielute iiméj zhichcuesa bagachteva wēt fi'nzewa'ja'srráa mpaacuewe, Dyus pucate Cristo ūsnitewe'shna. <sup>2</sup> Naa quiwetewe'sha's yajcymée, cielutewe'shrrá's myajcywe, <sup>3</sup> tyāa pa'gateway i'cue'sha' Cristo yacj ja'nda uusáa na'wē yuupa'ga, Cristo yacj fi'nzetsi'cue Dyus tashte. <sup>4</sup> Sa' i'cue'shtyi ītyi caafi'nze'jsa Cristo vyaate', i'cue'shva tyāa ma'wēsate' tyā'wēysa yuurra tyāa yacj ij ūsya' u'juene'cue.

**Ewmeesaty' nvijtrra ew yūuna fi'nzenity jypa'gani**

<sup>5</sup> Tyāa pa'ga i'cue'sh ūus yaacyni ewmeesa naata' tyāaty' jyuca manvijtwe: ptamumey pcalte fi'nzeni, ptamsarrava vitesa yacj pcal yūuna fi'nzeni, quījva ewmée yūuwa'jrrá's yaacyni, Dyus yu's yajcymée jweeírráa ji'pju wēena fi'nzeni, (tyā'wē ji'pju wēenirrá's yajcyte', tyā'srráanac Dyus na'wē yaacywa'j caseje'.) <sup>6</sup> Tyā'wē ewmée yūupa'ga írráa Dyus castigo seena'sa yuja' Dyusa's nwēese'jsameewe'shtyi. <sup>7</sup> I'cue'shva tyā'wē yūuna fi'nzesai'cue yu'. <sup>8</sup> Nava āchja' na'wēsaty jyuca manvijtwe: pyūuscue yaacyni, ūuschani, vitety ewmée nuywe'weni, wēeshuni, canzh we'weni tyā'wēsaty. <sup>9</sup> Tyāa pa'gateway jyuca nvijt yā'ji'cue na' puuty ya'īshiina fi'nzemée, <sup>10</sup> ewrráa yūuna fi'nzewa'ja's jypa'garra ūsi'cue. Tyā'wē yūurra' i'cue'sha' jweeírráa ya'yu'ptjejna u'juene'cue,

Dyusa's ew jiyuna pa'jrra tyāa na'wēy yuuna pa'jya'. <sup>11</sup>Atsa' tyā'wē ya'yu'ptjejnisa' maava jyuca cyteerraj teehrrāa yuuna pa'jsata'. Judiuwe'sh ma'ty yuu, judiuwe'shmée ma'ty yuu, circuncidāynisawe'sh ma'ty yuu, circuncidāynimeesawe'sh ma'ty yuu, wala jiisa ma'ty yuu, jiimeesa ma'ty yuu, patron ji'pjsa ma'ty yuu, patron ji'pjmeesa ma'ty yuu nava maava jyuca cyteerraj teehrrāa yuuna pa'jsata'. Tyāa pa'gatey Cristo's jypa'ganirráa tyā'wē', Cristo jyucaysawe'sh ji'.

<sup>12</sup>I'cue'sha' Dyus peeygājrra tyjitynisai'cue, tyāa pa'ga i'cue'sh ūuste na'wēsaty jypa'garra mfi'nzewe: vitety peeygāawa'ja's, pu'chna fi'nzewa'ja's, iiwech yajcymée maa yacjva jyuca ewrrāa fi'nzewa'ja's, puuty ūuscha yajcymée fi'nzewa'ja's. <sup>13</sup>Macue ewmée nuywe'weteva puuty ya'peltunāyna mfi'nzewe. Cristova ma'wēga i'cue'shtyi peltunāy tyā'wēy myūuwe i'cue'sh pwe'sh. <sup>14</sup>Sa' peeygājna fi'nzewa'j yuurrá's quijteva tjaacue wala mji'pjuwe. Tyāa maateva tjaacue peejysa'. <sup>15</sup>Tyā'wē yūunijū' Dyusa' ūsuna jyucaysa cyteerraj ūuste wēt wechana fi'nzewa'ja's. Tyā'wē jyucaysaty cyteerraj teehrrāa vit-ya'fírrác Dyusa' i'cue'shtyi tyjityj, tyāa pa'ga mweechawe. <sup>16</sup>Āchja' Cristo caapiya'jni's i'cue'sh ūuste jyuca mpiyawe. Tyā'wē yūurra puuty caapiya'jna, wala jypa'yacy puuty yu'cypejna, Dyusa's ūuste wechana memna mfi'nzewe. <sup>17</sup>I'cue'sha' quij yūuna ūsrrava, Cristo Jesusa's tuutje'jwa'ja's yuurráa myajcywe, Dyusa's yuurráa wechana.

#### Yattewe'sh maa yacjva jyuca ya'nwēese'jna fi'nzeni

<sup>18</sup>Nyuuwe'sha' i'cue'sh nmi'ty nwēese'jwa'j ji'pji'cue. Cristo's jiiyā'jrra', zhichcue fi'nzewa'ja'. <sup>19</sup>Atsa' nmi'we'shva peecy nyuu yacj puina yajtsemée peeygājna mfi'nzewe. <sup>20</sup>Tyā'wēy luuchwe'shva i'cue'sh neywe'shtyi quijteva jyuca mwēese'jwe. Tyā'wē yūuni's Dyusa' wecha'c. <sup>21</sup>Neywe'sha' peecy luuchtyi zhichcue yu'cypejna miipe'jwe pcyuumée, i'cue'sh yacj cuchcajmen. <sup>22</sup>Selpisaawe'sha' naa quiwete i'cue'sh patronwe'sh jycaajnyty wa'lmée mwēese'jwe quijteva jyuca. Patronwe'sh tjengna ūste āajurrāa nwēese'jmée, ūusuj jyuca wa'lmée mwēese'jwe, Dyusa' jiina sūjna. <sup>23</sup>Quij mjiitsrrava wa'lmée Cristo's selpiitstju sūjnarrāa cytey myuuwe, nasaty selpiitstju sūjmée. <sup>24</sup>Tyā'wē yajcyna selpiipa'ga, Cristo' i'cue'shtyi' cielute deweena, tyāa pa'gatey Cristo jii sūjrrane'cue mjii naa pa'ga. <sup>25</sup>Nava maava wa'ljajcyna mjiisa' achamée ewsarrá's jypa'gatyna, tyāa pa'gatey Dyusa' jyuca jiia' ma'wē yūuna fi'nzesateva.

**4** <sup>1</sup>Patronwe'sha' i'cue'shtyi selpisaaty ewrrāa jype'jna meswe. Tyā'wēme', i'cue'shva selpisāa fírrāa i'cue, i'cue'shtyi jycaajsa' Cristo cielute ūsa'.

<sup>2</sup>Āchja' wala jypa'yacy Dyus yacj yuurráa puuty we'wena meswe, pechcanamée Dyusa's wechana. <sup>3</sup>Sa' cue'sh pa'gateva tyā'wēy Dyus yacj puuty we'wena meswe, Dyus yuwe pta'shwa'j en vyaacajn, cyaj

Cristo's ma'wē ũuste jypa'gawa'ja'sva jiyunimeesa's pta'shi'nja. Tyā'wē pta'shpa'ga'fírráa andya' preesu ũstju. <sup>4</sup>Nava Dyus pu'chte', shiingmée ew āate caajiyu'ju'nja.

<sup>5</sup>Dyusna jiimeesawe'sh yacj wala jypa'yacy ewrráa mfi'nzewe, ewmée we'wecajmen. Sa' Dyus yuwe pta'shwa'j ena's iviitnuwe. <sup>6</sup>I'cue'sha' zhichcue ewrráa jypa'yacy mwe'wewe. Tyā'wē yūurra', ma'wēsa yacjva tjēymée pasya' ājane'cue.

### Yuwe wechaa caajnyity fi'jni

<sup>7</sup>Cue'sh yacjtjē'j Tíquico Cristo's selpiic andy yacj ja'nda quījteva pu'vitumée pu'chna tyā' i'cue'shtyi pta'shina andy fi'nzeni's. <sup>8</sup>Tyā'wē pta'shna i'cue'shtyi cchjāachja'cjan cajastju. <sup>9</sup>Tyāa yacj teech pi'cyna yuja', Cristo's jypa'gasa cue'sh yacjtjē'j Onésimo. Tyā' i'cue'sh chjambteywe'sha'. Tyāawe'sh pa'jrra jyuca pta'shityna aysū quījrraj yūutsteva.

<sup>10</sup>Carcelte andyna pi'cyna ũssa Aristarcova yuwe wecha caja'c, vite' Bernabé pucacjē nyacj Marcosva. I'cue'sha' jiiyā'ji'cue Marcos ma'wēsateva, tyāa pa'ga wa'lmée mpa'gawe. <sup>11</sup>Jesus Justo jī'ty tyāava yuwe wechaa caja'c. Judiuwe'sh Cristo's jypa'gasa andya's pu'chsa yu' tyāawe'sh yuurráaty yu', Dyus jycaajwa'ja's pta'shsa. Tyāa pa'ga andy yacj' wala wecha yuja'. <sup>12</sup>Cristo's selpisáa Epafrasva yuwe wechaa caja'c. Tyā' i'cue'sh yacj ũssac yu'. Tyā' i'cue'sh pa'gate bagachteva Dyusa's neewe'wena nescu yu', quījteva jypumbamée Dyus jytjāasnirrá's cytey yuuna fi'nzecajn. <sup>13</sup>Andya' jii'tj Epafrasa' i'cue'shtyi yajcyna wala pa'pchu'c, Dyusa's neewe'wena. Sa' Laodicea chjambtewe'sh vite' Hierapolis chjambtewe'shtyiva tyā'wēycu Dyusna neewe'we'. <sup>14</sup>Médico Lucas vite' Demas tyāawe'shva yuwe wechaa caja'ty.

<sup>15</sup>Yuwe mweechawe yacjtjē'jwe'sh Laodiceatewe'shtyi vite' Ninfasna, sa' tyajy yatte pcjaacjesawe'shtyiva tyā'wēy. <sup>16</sup>Naa carta's i'cue'sh pwe'sh lēeyna jyā'jrra', mcaajwe Laodicea chjambte pcjaacjesawe'sh lēeycajn, sa' Laodicea chjambtewe'shtyi carta caatj tyāa carta i'cue'sh tashte pa'tje', tyā'snava mlēeywe. <sup>17</sup>Arquiposa's na'jīna myu'cypejwe: Cristo mjīia's cytey myuu jīna.

<sup>18</sup>Andy cuseju yuu naa carta's fi'jrra cajastju i'cue'shtyi wechana. Nava andya's pechcanamée yajcyna mfi'nzewe, preesu ũstju naa pa'ga. I'cue'shtyi' Dyusa' pu'chjina.